

# Conferenza da presidents stagl parlament regiunal

Debatta da detagl davart la legislaziun consecutiva tar la refurma dal territori en il cussegl grond

DA MARTIN CABALZAR

■ **En la debatta da detagl davart la legislaziun consecutiva tar la refurma dal territori ha il cussegl grond suandà per gronda part las propostas da la regenza e da la maioritad da la cumissiun predeberanta.** En l'avegnir na datti betg pli parlaments regiunals (u radunanzas da delegads), suprastanzas regiunals e presidents regiunals tschernids dal pievel sco quai è actualmain il cas en Surselva. En l'avegnir duain conferenzas da presidents communalas e giuntas da questas conferenzas diriger e schliar ils pensums regiunals. Propostas per surdar dapli libertads a las regiuns da definir senza las structures organisatoricas n'han betg pudì persvader il cussegl grond. Già pli baud aveva quel numnadain decidì da decretar a las regiuns da surengiu ina structura organisatorica unificada. Cun integrar obligatoricain ils presidents communalas en ils gremis regiunals han regenza e cussegl grond vuli rinforzar las vischnancas ed impedir che las regiuns sviluppan in'atgna dinamica, ha accentuà cussegliera governativa *Barbara Janom Steiner* en il cussegl grond.

## Incumbensas ed organizaziun futura da las regiuns

Las regiuns duain servir a las vischnancas per ademplir a moda efficienta lur pensums. Ellas adempleschan era las incumbensas che vegnan surdadas ad ellas dal chantun. Per pudair ademplir questas incumbensas pon las regiuns incassar taxas e contribuziuns u retrair eventualas subvenziuns. L'adossament da pensums da las vischnancas a la regiun ha da succeder sin fundament da cunvegns da prestaziun. Las regiuns èn era legitimadas da



Regenza e maioritad da la cumissiun represchentada entras deputà Bruno Claus (pld Cuira) han gudagnà la lutga.

FOTO Y BÜRKL

schliar cuminaivlamain en senn da spazis funcziunals ils pensums adossads. Era pon singulas vischnancas da regiuns vischinas vegnir consultadas per schliar pensums surregiunals, ellas n'han dentant nagin dretg da vuschar.

En l'avegnir vegn la regiun a sa cumponer dals suandants organs: la totalitad dals abitants da la regiun cun dretg da vuschar, la conferenza dals presidents communalas, la giunta da la regiun e la cumissiun da gestiun. A la creaziun da

giuntas regiunals po vegnir renunzià sche las relaziuns giustifitgeschan quai. En regiuns senza giuntas regiunals vegnan ils pensums ademplids da la conferenza da presidents u ch'els pon vegnir delegads al post da gestiun sch'i sa tracta d'ina pura fatschenta administrativa.

## Refusà las propostas da las regiuns

Cun questa soluziun ha il parlament suandà la proposta da regenza e cumissiun e renvià las propostas dals repre-

schentants da las regiuns. Uschia è la proposta dal president regiunal da la Surselva *Ernst Sax* (pcd Rueun) da stritgar las giuntas regiunals vegnida refusada cun 85:30 vuschs, ina proposta da cumpromiss da *Luca Tenchio* (pcd Cuira) cun 74:38 vuschs.

Per conceder dapli libertads da las regiuns resp. als presidents *Silvia Casutt* (pcd Foppa), *Cornelia Märchy* (pcd Razén), *Margrit Darms* (pcd Foppa), *Daniel Blumenthal* (pcd Lumnezia), *Ni-*

*coletta Noi* (independenta Roveredo) e *Ludwig Caluori* (pcd Belfort). Tant Margrit Darms sco Silvia Casutt crititgeschan ch'ils resuns sin la consultaziun da las regiuns e partidas sajan vegnids ignorads. Resguardond la heterogenitad da las regiuns na saja in'organizaziun unificada per l'entir chantun betg opportuna e pli efficienta. Cunvegns da prestaziun cumplitgeschian l'organizaziun.

La proposta da la regenza han sustegnì principalmain *Bruno Claus* (pld Cuira), *Peter Peyer* (ps Trin), *Walter Grass* (pbd Tusaun) ed *Agnes Brandenburger* (pps Tschintg Vitgs). *Karl Heiz* (pld Puschlav) avertescha da betg sufflar sin in apparat administrativ sin donn e cust da las vischnancas.

*Jon Domenic Parolini* (pbd Suot Tegna) pledescha per la pussaivladad da cumpletter la giunta regiunala cun persunas dal rom cun competenzas spezialas per differents secturs. Bruno Claus avertescha da betg stgaffir giuntas che funcziunan sco «umbrivas da la conferenza da presidents». Barbara Janom Steiner ha punctuà che las conferenzas da presidents hajan vinavant la pussaivladad d'engaschar experts u stgaffir cummissiuns sco gremis consultativs, dentant senza competenza da decisiun.

Il cussegl ha dà cun 73:34 la preferenza a la proposta da la regenza e da la maioritad da la cumissiun.

## Extender la basa da decisiun

Refusada vegn era la proposta da *Sascha Müller* (ps Tavau) per extender la basa d'elecziun da las giuntas regiunals era sin ulteriuras persunas, cuntanschind uschia ina basa pli vasta. Cunzunt per las domenas turissem, cultura, scolaziun ed economia saja quai necessari.